



XUNTA DE GALICIA



PROTOCOLO DE COLABORACIÓN ENTRE A VICEPRESIDENCIA E CONSELLERÍA DE PRESIDENCIA, ADMINISTRACIÓNS PÚBLICAS E XUSTIZA E O CONSELLO GALEGO DE ENXEÑEIROS TÉCNICOS INDUSTRIAIS, PARA A PRESTACIÓN DE ASISTENCIA PERICIAL Á ADMINISTRACIÓN DE XUSTIZA

Santiago de Compostela, 20 de maio de 2013

REUNIDOS

Dunha banda, **D. Alfonso Rueda Valenzuela**, na súa condición de Vicepresidente e titular da Consellería de Presidencia, Administracións Públicas e Xustiza da Xunta de Galicia en virtude do establecido no Decreto 230/2012, do 2 de decembro, e no Decreto 229/2012, do 2 de decembro, actuando en representación da Xunta de Galicia de conformidade co disposto no artigo 34 da Lei 1/1983, do 22 de febreiro, de normas reguladoras da Xunta e da súa Presidencia.

Doutra banda, **D. Jorge Rivera Gómez**, na súa condición de Presidente do Consello Galego de Enxeñeiros Técnicos Industriais, no seu nome e representación, de acordo co establecido no artigo 10 dos seus estatutos.

Ambas as dúas partes, en nome e representación en que concorren e coa capacidade legal e necesaria para este acto,

EXPOÑEN

I. A Xunta de Galicia ten atribuídas competencias e funcións en materia de xustiza en virtude do artigo 20 do Estatuto de autonomía de Galicia, aprobado pola Lei orgánica 1/1981, do 6 de abril, que se exercen a través da Vicepresidencia e Consellería de Presidencia, Administracións Públicas e Xustiza. É desexo desta Consellería a realización de todas aquelas actuacións coas que poida acadarse a maior eficacia en relación cos temas da Administración de xustiza en xeral, segundo as funcións que lle atribúe o Decreto 72/2013, do 25 de abril, polo que se establece a súa estrutura orgánica.

II. A conveniencia de dotar a Administración de Xustiza con mecanismos de asesoramento pericial, por técnicos privados nestas materias, é a razón que aconsella



iniciar unha liña de colaboración entre a Consellería e o Consello Galego de Enxeñeiros Técnicos Industriais.

Co obxecto de articular a dita cooperación elabórase este documento.

CLÁUSULAS

Primeira. É obxecto do presente protocolo de colaboración establecer a vontade de colaboración entre a Vicepresidencia e Consellería de Presidencia, Administracións Públicas e Xustiza e o Consello Galego de Enxeñeiros Técnicos Industriais no ámbito da quenda de asistencia pericial á Administración de Xustiza en Galicia, enmarcada no principio xeral de colaboración recollido na Lei 11/2001, do 18 de setembro, de Colexios Profesionais da Comunidade Autónoma de Galicia.

Segunda. Aos efectos de facer efectiva a vontade de colaboración recollida na cláusula primeira a Vicepresidencia e Consellería de Presidencia, Administracións Públicas e Xustiza e o Consello Galego de Enxeñeiros Técnicos Industriais establecerán a correspondente relación contractual para que o Consello organice unha quenda para a prestación de asesoramento e ditame pericial nos procedementos penais nos que se requira por un xuíz ou tribunal a proba pericial de oficio ou a pedimento do Ministerio Fiscal ou cando a proba fose acordada a solicitude dun beneficiario de asistencia xurídica gratuíta, así como cando se acordase, en procedemento de calquera orde xurisdiccional, polo xuíz de oficio ou a pedimento do Ministerio Público en beneficio de menores abandonados ou persoas incapaces ou desvalidas ou fose acordada polo xuíz a solicitude dun beneficiario de asistencia xurídica gratuíta

O dito ditame será emitido por un profesional colexiado, por designación e baixo control deontolóxico do Consello Galego de Enxeñeiros Técnicos Industriais e nas condicións que se regulan no presente Protocolo de colaboración.

Terceira. Queda excluído do ámbito do presente protocolo de colaboración o encargo profesional de parte, como perito privado, que se regulará polas condicións convidadas entre as partes.





XUNTA DE GALICIA



Cuarta. O Consello Galego de Enxeñeiros Técnicos Industriais ten absoluta autonomía e responsabilidade en canto ao sistema de selección e clasificación dos profesionais para elaborar unha lista de peritos na súa materia e a repartición de peritaxes. O Consello Galego de Enxeñeiros Técnicos Industriais controlará a formación e o control deontolóxico dos peritos, a liquidación das peritaxes e a repartición das cantidades por percibir da Administración para a súa indemnización.

Quinta. A quenda estará atendida polos colexiados que se inscriban voluntariamente e que haberán de reunir os requisitos de cualificación técnica, formación e experiencia práctica que o Consello Galego de Enxeñeiros Técnicos Industriais determine e a Administración de Xustiza requira.

Sexta. O Consello Galego de Enxeñeiros Técnicos Industriais garantirá a correcta prestación do servizo polos peritos e centralizará a información e os datos estatísticos. Serán funcións do Consello Galego de Enxeñeiros Técnicos Industriais:

1. Confeccionar as listas de peritos que integran a quenda.
2. Atender os requirimentos da Dirección Xeral de Xustiza e comunicar a identidade do perito ou peritos solicitados.
3. Coidar da formación permanente dos seus membros.
4. Exercer o control deontolóxico no desenvolvemento da función pericial, propoñendo, se é o caso.

Sétima. A incorporación á quenda de peritos forenses do Consello Galego de Enxeñeiros Técnicos Industriais efectuarase unha vez ao ano; terá carácter voluntario e producirase por petición do interesado, acreditando as condicións que de seguido se sinalan:

- a) A pertenza e a incorporación ao Consello Galego de Enxeñeiros Técnicos Industriais.
- b) A antigüidade no desempeño efectivo da súa profesión polo menos de tres anos.



- c) A acreditación, a xuízo do Consello Galego de Enxeñeiros Técnicos Industriais, dunha formación específica, ou a participación en cursos de especialización dirixidos á avaliación e á peritaxe que se solicita.
- d) Non estar incursos en incompatibilidade legal ou deontolóxica.

Oitava. Os peritos terán os seguintes dereitos:

- Ser nomeados como peritos de acordo co procedemento establecido.
- Asistir aos cursos de formación continuada que se establezan.
- Dereito ao cobro dos honorarios correspondentes a súa peritaxe nas condicións convidas, con obriga de reintegro á Xunta de Galicia se percibisen os honorarios por outras vías.

O cobro de dita cantidade non impide o cobro dos honorarios por vía ordinaria, contra a parte condenada en custas, agás no caso en que esta teña recoñecido o dereito á asistencia xurídica gratuíta ou sexa declarada insolvente.

En caso de cobro dos honorarios da parte condenada ao pagamento das custas o profesional deberá reintegrar á Xunta de Galicia o percibido con anterioridade, en concepto de compensación económica.

Novena. A adscrición voluntaria á lista de peritos do Consello Galego de Enxeñeiros Técnicos Industriais somete o profesional colexiado aos seguintes deberes:

- Aceptar as cláusulas do presente protocolo de colaboración
- Aceptar os nomeamentos, agás incompatibilidade ou causa xustificada
- Declarar a súa incompatibilidade nos casos en que se produza
- Manter unha información continuada
- Entregar un xustificante de ter presentado no órgano xudicial ou fiscal o informe pericial para o arquivo do servizo no Consello Galego de Enxeñeiros Técnicos Industriais salvando os casos de segredo sumarial e do dereito á intimidade das persoas
- Deber de comparecer
- Deber de prestar xuramento ou promesa





XUNTA DE GALICIA



- Deber de examinar o obxecto da peritaxe
- Deber de emitir o ditame no tempo requirido e na forma oportuna, coa necesaria contradición procesual, de forma oral ou escrita, pero en calquera caso fundamentada en conclusións claras e nunha relación lóxica, e a posibilidade de emitir un só informe, cando fosen os peritos contestes, ou tantos como opinións se sustenten respecto do feito obxecto da peritaxe.
- Deber de gardar segredo sobre as actuacións coñecidas como consecuencia da peritaxe
- Deber de reintegro á Xunta de Galicia da contía recibida desta Administración, no caso de que se lograra o cobro da peritaxe por outros medios

Décima. O órgano xudicial requirirá o perito á Dirección Xeral de Xustiza, indicando o número do asunto e o nome do propoñente, se o houber.

A Dirección Xeral de Xustiza solicitará a designación ao Consello Galego de Enxeñeiros Técnicos Industriais, que seleccionará o perito que corresponda segundo a orde dentro da listaxe que teña elaborado. No caso de renuncia do perito seleccionado, será seleccionado o seguinte da lista.

O perito aceptará e, unha vez realizada a peritaxe, entregará o orixinal do informe pericial ao órgano xudicial, que será o encargado de certificar a realización da peritaxe.

O Consello Galego de Enxeñeiros Técnicos Industriais, unha vez establecida a relación contractual coa Vicepresidencia e Consellería de Presidencia, Administracións Públicas e Xustiza, efectuará unha liquidación trimestral das compensacións económicas e a remitirá conxuntamente coa factura e a certificación á Dirección Xeral de Xustiza para que se proceda ao pagamento ao dito Consello Galego de Enxeñeiros Técnicos Industriais.

O Consello Galego de Enxeñeiros Técnicos Industriais, pola súa parte, aboará os honorarios aos seus colexiados.

Décimo primeira. A Vicepresidencia e Consellería de Presidencia, Administracións Públicas e Xustiza pagará, nos casos que proceda, e sempre de acordo co establecido na relación contractual xa mencionada, as liquidacións trimestrais presentadas polo Consello Galego de Enxeñeiros Técnicos Industriais, sen necesidade de que se ditase sentenza, co compromiso por parte da Entidade colexial de velar pola devolución dos honorarios se de resultas da sentenza hai condena en custas a algunha das partes do procedemento ou por calquera outro medio se realiza o reintegro dos honorarios definitivos ou, en todo caso, non debese corresponder o pagamento á Administración.





XUNTA DE GALICIA



Décimo segunda. O presente protocolo de colaboración entrará en vigor ao día seguinte da súa sinatura.

Décimo terceira. Para facilitar o seguimento do presente protocolo, constituirase unha Comisión Mixta, integrada por representantes de cada unha das partes asinantes.

A Comisión Mixta ditará as súas propias normas de funcionamento, debéndose reunir cando o solicite algunha das partes.

As súas funcións serán:

- Interpretación do protocolo.
- Intervención previa á resolución por incumprimento.
- Calquera outra relacionada co desenvolvemento do presente protocolo

Décimo cuarta. Serán causas de resolución do presente protocolo de colaboración:

1.- A resolución por incumprimento das cláusulas do mesmo, pola Consellería da Presidencia, Administracións Públicas e Xustiza, ou polo Consello Galego de Enxeñeiros Técnicos Industriais.

2.- Por acordo da Vicepresidencia e Consellería de Presidencia, Administracións Públicas e Xustiza e o Consello Galego de Enxeñeiros Técnicos Industriais

3.- Por desaparición das condicións que serven de base á súa realización.

E en proba de conformidade de canto antecede, e para a debida constancia, asíñase o presente protocolo de colaboración no lugar e data arriba indicados.

O VICEPRESIDENTE E CONSELLEIRO DE
PRESIDENCIA, ADMINISTRACIÓNS
PÚBLICAS E XUSTIZA



Alfonso Rueda Valenzuela

O PRESIDENTE DO CONSELLO GALEGO
DE ENXEÑEIROS TÉCNICOS
INDUSTRIAIS



Jorge Rivera Gómez